




Diahuebs 2 Februari 2023

Email: [IslaOnline@gobierno.aw](mailto:IslaOnline@gobierno.aw) Tel: 528-4952

 **ISLA**ONLINE

Noticia di Gobierno

2023







*Evelyn Wever-Croes*  
PRIME MINISTER



# PAISNAN DEN REINO LO SIGUI INTERCAMBIA INFORMACION CU VENEZUELA

**Tercer reunion tecnico cu tocante reapertura di frontera a tuma luga**



Diamars 31 januari 2023 a tuma luga e di tres reunion tecnico tocante reapertura di frontera entre e paisnan den Reino y Venezuela desde cu a cera frontera na 2019. Conforme e declaracion mutuo cu previamente a keda acorda dia 13 di december 2022, e consultanan ta trata e reapertura gradual di e frontera maritimo y aereo.

Durante e reunion Aruba tabatin e oportunidad mescos cu cada pais pa trece su exigencianan y condicionnan dilanti pa e reapertura di e frontera maritimo. A trata ampliamente e situacion di botonan chikito ('barquitos') cu productonan for di Venezuela pa Aruba, considerando e diferente circunstancianan di cada pais esta Aruba, Boneiro y Corsou. Tambe a trata otro formanan di trafico maritimo. Alabes a discuti tocante un tratado di Douane entre e paisnan di Reino y Venezuela.

Proximamente lo sigui trata y intercambia mas informacion pa percura pa institui e proceduranan di control y verificacionnan necesario. Asina cu ricibi informacionnan necesario y ta cumpli cu e rekisitonan presenta na Venezuela, Gobierno di Aruba por propone un fecha concreto pa reapertura di frontera maritimo.

Den e proximo periodo lo sigui traha riba e puntonan tecnico pa yega na un apertura sigur y gradual di e frontera.



**DEN UNION Y CU POSITIVISMO  
NOS LO HIBA NOS PAIS  
PADILANTI!**



## Prome Minister Evelyn Wever-Croes: **REPRESENTANTENAN DI 9 AGENCIA DI NACIONNAN UNI TA NA ARUBA E SIMAN AKI**



Ta prome biaha den historia di Aruba cu un delegacion asina grandi di Representantenan di organisacionnan di Nacionnan Uni ta di bishita di trabao na Aruba. Esaki net despues di e bishita di e famia Real. Un siman hopi activo y un otro siman mas di hopi importancia.

E Representantenan di e agencianan di Nacionnan Uni ta bishita Aruba pa cera conoci cu Aruba y asesora con pa por asisti Aruba y sondea con pa complementa otro programanan existente na Aruba manera e landspakket entre otro. Nacionnan Uni tin un experiencia amplio y profundo pa locual ta trata e maneho den islanan chikito ya cu nan ta brinda sosten na mas di 50 isla na nivel Mundial. P'esey mes Gobierno di Aruba ta masha contento cu e bishita di expertonan di agencianan clave pa Aruba su Desaroyo Sostenible.

Riba agenda, e representantenan a reuni cu Ministernan diahuebs mainta, y cu hefenan di departamento y beleidsmedewerkers di Gobierno. Nan lo reuni cu Sociedad Civil y tambe lo tin nan programa separa.

Prome Minister Evelyn Wever-Croes, den nomber di Gobierno di Aruba ta yama bon bini na e Resident Coordinator di Nacionnan Uni pa Aruba, Corsou, St. Maarten, Trinidad y Suriname, mr. Denis Zulu y representantenan di organisacionnan di Nacionnan Uni y alabes ta gradici nan pa nan bishita di trabou na Aruba y pa cera conoci mas di cerca cu e desaroyonan na nos pais. "Den un aña di union y positivismo pa un Aruba mas fuerte y mas resiliente, ta importante tur sosten cu nos por haya di expertonan clave pa e desaroyo sostenibel di Aruba", Prome Minister a expresa.





# PROME MINISTER EVELYN WEVER - CROES A INFORMA PARLAMENTO DI E ACUERDONAN HACI DEN CUADRO DI E "ONDERLINGE REGELING"



E siman aki Prome Minister Evelyn Wever - Croes tabata den Parlamento pa duna un splicacion amplio y contesta preguntanan tocante e acuerdo cu Aruba, Corsou, Sint Maarten y Hulanda a yega na dje recientemente cu ta haci cu COHO no lo wordo introduci. Manera a anuncia recientemente, e paisnan den Reino a yega na acuerdo den liñanan grandi cual ta haci cu COHO no lo wordo introduci mas y na su luga ta bin cu un "Onderlinge Regeling"

Prome Minister Wever - Croes a splica di e situacion cu a conduci na e propuesta di Hulanda pa bin cu COHO. E no ta un secreto cu e pandemia a pone cu Aruba mester a bay busca otro forma pa por a yega na fondonan. Aruba como un isla cu ta depende di turismo tabata un di e paisnan mas afecta door di e pandemia. E pandemia a bay cu 25% di Aruba su GDP ora cu a cera e fronteranan di 16 di Maart te 1 di Juli 2020 y ora a habri bek e resto di mundo no a habri ainda, esaki a pone cu e entradanan a bay atras cu 244 miyon. Ademá, a haya extra gasto pa motibo cu mester a cubri gastonan den sector publico cu a sigui normal, tabatin extra gasto di salubridad y manejo di e crisis y extra peso di gastonan di comunidad, y sector priva cual prome cu e pandemia no tabata e caso.

Den e periodo aki di incertidumbre financiero, mercadonan internacional a cera pa Aruba. Sinembargo e prioridad di gobierno tabata pa scapa bida di hende, pone pan riba mesa di esnan mas vulnerabel y recuperacion di nos pais. A haci esaki a traves di Loonsubsidie, Fase, MKB ondersteuning y paketenan di cuminda. Tur esaki a pone cu mester a presta 916 miyon florin total di Hulanda. Hunto cu e prestamo aki, Hulanda a pone algun condicion entre otro: pa bin cu e ley di Reino di COHO, y e ley di Reino di RAFT. A pesar cu no tabata di acuerdo cu e condicionnan na cierto momento a haya presion interno ora placa tabata cabando, pa toch firma. Dia 13


di November 2020 a firma cu Hulanda mirando cu no tabata tin otro opcion. Prome Minister a splica cu durante henter e proceso a informa Parlamento y stakeholders regularmente y a te hasta involvi otro partidonan politico cu no tabata tin representacion den Parlamento. Despues di a negocia dos aña riba e contenido di e leyman aki di Reino, e concepto di Ley di Reino a bay na Parlamentonan y Parlamento di Aruba a indica cu e no ta sostene un rijkswet. Consecuentemente mester a bay sinta bek na mesa hunto cu Hulanda, Corsou y Sint Maarten y delibera desde e momento ey te aworaki.

Reunion den cual a presenta un alternativa pa COHO Na luna di juni 2020 tabatin un 'bestuurlijk overleg' na Aruba conhuntamente cu Prome Minister di Aruba, Corsou y Sint Maarten hunto cu Secretario di Estado Alexandra van Huffelen caminda cu cada pais a presenta un otro alternativa. Aruba su alternativa tabata pa bin cu un 'Onderlinge Regeling'. Durante e reunion aki a tuma e decision cu e alternativa di Aruba ta esun cu ta conta cu mas sosten y cu Aruba, Corsou y Sint Maarten lo sigui traha riba e 'Onderlinge Regeling' pa mira si por yega na un areglo completo. Tur ekipo a traha hopi duro y na januari 2023 tabata tin un otro 'bestuurlijk overleg' cual a tuma luga na Sint Maarten, caminda a aproba den liñanan grandi e 'Onderlinge Regeling'. E meta ta pa yega na un acuerdo y por firma na maart 2023.

Prome Minister Wever - Croes a expresa cu e resultado aki ta mas aceptabel cu lo cual tabatin anteriormente pa motibo cu e ta duna mas realce na nos constitucion, nos sistemanan di ley y mas respet na nos Parlamento. E Onderlinge Regeling no ta cambia nada di e contenido di e landspakket pasobra esaki ta un areglo riba su mes. E COHO lo a bin banda di dje pa maneha con e trabounan ta tuma luga pa cu e reformanan. Prome Minister a sigui splica cu lo sigui informa Parlamento manera a bin ta haci durante e dos añanan aki. Cada kwartaal ta informa Parlamento di e uitvoeringsagenda y na fin di e kwartaal ta duna Parlamento un uitvoeringsrapportage pa nan por wak kico logra y kico falta. Ademá, den e ultimo kwartaal di 2022 a bin cu henter e ekipo di trekkers pa duna mas informacion.

Por ultimo, Prome Minister a expresa cu e reformanan ta importante pasobra nan ta haci Aruba mas fuerte y mas resiliente cu si cualkier cos pasa den futuro, Aruba lo no cay asina duro manera cu tabata e caso cu e pandemia. Consehero di gobierno sr. Carlos Guiamo a duna tambe un presentacion di e diferencianan den e dos areglonan. Den un siguiente articulo lo elabora mas riba esaki.





## Minister Maduro na ocasion di e Bishita Real: PLAZA PADU TABATA YENA CU CREATIVIDAD ARTISTICO Y ALEGRIA DI NOS HOBENNAN DI SCOUTING Y CLUB DI DEPORTE



Riba e di dos dia di e Bishita Real, e Famia Real a bishita Plaza Padu cu tabata scenario pa musico, artesano y hobennan di diferente grupo di scouting y deporte topa cu e Famia Real prome cu nan bay disfruta di e show di Bon Bini Festival na Fort Zoutman.

Cu hopi alegria e muchanan a cera conoci cu e Rey, Reina y Princesa cu a pasa saluda nan. E Famia Real a tuma tempo tambe pa admira e obranan di arte di nos artistanan local, mientras cu e scenario tabata ta yena cu baile y musica.

Na caminda pa Bon Bini Festival e Famia Real por a admira un bunita 'mapping' di potretnan di SA Princesa Amalia proyecta riba e toren di Fort Zoutman na honor di e Princesa su prome bishita na Aruba.

Minister Maduro ta gradici tur instancia y persona cu a haci e evento aki un exito, specialmente e Comision Real cu a prepara e bunita programa na Plaza Padu.





Continuacion PLAZA PADU TABATA YENA CU CREATIVIDAD ARTISTICO....





# Minister di Cultura: CU UN PASEO DI ARTE, HISTORIA, BAILE Y POESIA, E FAMIA REAL A WORDO RICIBI NA SAN NICOLAAS

Riba e prome dia di e bishita di e Famia Real na Aruba, nan a bishita San Nicolaas pa asina nan por a disfruta di e creatividad cu ta concentra den e ciudad aki di nos Pais.

E bishita a cuminsa na Filomena College MAVO na unda cu e Famia Real a haya un presentacion riba kende tabata Boy Ecury y tambe nan por a admira un mural cu a wordo crea di dje. Di aki e famia a sigui pa Museo Industrial na unda por a haya sa mas di e desaroyo di Aruba di un 'Isla Inutil' pa e 'One Happy Island' cu nos ta awo danki na e industria di turismo. Despues a sigui un recorrido pa admira e mural nan den e cayanen di San Nicolaas, bou guia di Tito Bolivar di Artisa. E Famia Real a haya un presentacion y informacion di tur e muralnan di e districto di arte aki. Bunita tabata cu e personanan cu a wordo pinta, tabata presente pa asina hiba combersacion cu e Famia Real. E recorrido a finalisa na Nicolaas Store na unda cu e Famia Real por a disfruta di presentacion di baile di nos hobennan, sigui pa declamacion di un bunita poesia dedica na Princesa Amalia.

Minister di Cultura ta gradici e Comision Real y tur esnan cu a haci e bishita di e Famia Real na San Nicolaas uno exitoso yena cu bunita recuerdo di e creatividad na Aruba.





Continuacion CU UN PASEO DI ARTE, HISTORIA, BAILE Y POESIA....







## PABIEN SETAR NV CU 20 AÑA DI INNOVACION, PROGRESO Y EXITO



Mi kier extende mi caluroso felicitacion na empleadonan di Setar NV, pasado y presente, cu celebracion di 20 aña di Setar NV! Como un actor clave den industria di telecomunicacion na Aruba, Setar NV semper a hunga un rol fundamental den avansa e paisahe tecnologico di e isla, y tambe semper a contribui cu comunidad.

Durante añanan, tecnologia a hunga un rol critico den forma nos bida y e forma cu nos comunica. Setar NV semper a bai na prome luga di e cambio aki, introduciendo solucionnan nobo y innovativo cu a keda modernisa e industria local.

Boso esfuerzo y enfoke riba avansamento a impulsa Aruba como un di e paisnan mas tecnologicamente avansa den nos region.

Nos ta refleha riba 20 aña pasa mientras ta celebra logronan di nos empleadonan pasado y presente. Boso trabou duru y dedicacion a yuda Setar NV bira un proveedor di servicio di telecomunicacion confiabel na Aruba.

Aki ta pa 20 aña mas di innovacion, progreso y exito!



Na empleadonan di Setar NV, pasado y presente,

Mi kier extende mi caluroso felicitacion na boso tur cu celebracion di 20 aña di Setar NV! Como un actor clave den industria di telecomunicacion na Aruba, Setar NV semper a hunga un rol fundamental den avansa e paisahe tecnologico di e isla, y tambe semper a contribui cu comunidad.

Durante añanan, tecnologia a hunga un rol critico den forma nos bida y e forma cu nos comunica. Setar NV semper a bai na prome luga di e cambio aki, introduciendo solucionnan nobo y innovativo cu a keda modernisa e industria local.

Boso esfuerzo y enfoke riba avansamento a impulsa Aruba como un di e paisnan mas tecnologicamente avansa den nos region.

Nos ta refleha riba 20 aña pasa mientras ta celebra logronan di nos empleadonan pasado y presente. Boso trabou duru y dedicacion a yuda Setar NV bira un proveedor di servicio di telecomunicacion confiabel na Aruba.


Aki ta pa 20 aña mas di innovacion, progreso y exito!

*Geoffrey Wever*

Minister di Asuntunan Economico,  
Comunicacion y Desaroyo Sostenibel



Ministerio di Asuntunan Economico,  
Comunicacion y Desaroyo Sostenibel







## A FIRMA ACUERDO CU ELMAR N.V. PA INSTALACION DI CAMARANAN DI SIGURIDAD RIBA AMBOS RUTA DI CARNAVAL

Diahuebs mainta, Minister di Husticia y Asuntonan Social Sr. Rocco Tjon a firma un acuerdo cu Elmar N.V. pa hacie posibel pa por ekipa ambos ruta di carnaval, esta esun di San Nicolas como tambe esun di Oranjestad, cu camaranan di siguridad. Ta trata di un proyecto piloto inovativo, mirando cu nunca antes esaki a wordo haci, cual ta un metodo sumamente di balor agrega pa cu Cuerpo Policial.

Segun e mandatario, e temporada di carnaval, ta uno sumamente druk pa Cuerpo Policial, pa e motibo ey, ta percura pa facilita nan trabou, a traves di e camaranan di siguridad. Pues, na un manera mas eficiente y eficaz, nan por wordo dirigi na momento cu esaki capta señalnan cu tin cierto disturbionan pasando. Di otro banda a traves di e camaranan aki, nos ta garantisa mucho mas siguridad pa tur e mirones cu ta bay gosa di carnaval.

Manera a menciona, esaki ta e prome biaha cu Ministerio di Husticia ta ehecuta un proyecto piloto asina. Sin mas, ta importante pa menciona cu e tipo di proyectonan aki ta imposibel pa ehecuta for di un solo ministerio, pues, nos ta agradecido pa e colaboracion cu nos a ricibi for di Ministerio di labor y energia encarga pa colega Minister Glenbert Croes.

Pa recapitula, e prome fase pa loke ta camaranan di siguridad ta den pleno ehecucion pa e high-rise especificamente beach-side area. Recientemente, a firma e MB pa e proyecto di camara di siguridad pa e high-rise hot zone area como tambe pa e caya principal di San Nicolas. A aproba pues e instalacionnan pa caya principal di San Nicolas, cual lo inicia otro siman. Despues di esaki lo haci un evaluacion pa y a base di e evaluacion lo continua pa fase cuater pa loke ta e camaranan di siguridad pa nos careteranan publico pa asina garantisa siguridad riba nos careteranan.

Por ultimo, Minister Tjon a clausura cu palabranan di pabien na ambos Elmar N.V. y na Cuerpo Policial pa cu e proyecto aki. For di Ministerio di Husticia y Asuntonan Social lo sigui traha pa eleva siguridad pa nos comunidad.







## MINISTER ENDY CROES TA FELICITA ASV RIVER PLATE CU NAN 70 ANIVERSARIO

Diaranson, 1 di februari ASV River Plate a conmemora e club su 70 aña di existencia. En conexion cu e dia memorabel aki, den ora di anochi tabatin un brindis combina cu wega di futbol di U20 entre ekipo di RCA y ASV River Plate. Minister Endy Croes tabata presente na veld di River Plate pa e ocasion special aki na unda e dignatario a hiba palabra y den nomber di Gobierno di Aruba a otorga un reconocimiento na ASV River Plate, pa nan gran contribucion na futbol di Aruba.

E organisacion ASV River Plate semper a traha pa e hobennan di e bario di Madiki, Playa Pabou y bisindario. Minister Endy Croes ta felicita y gradici funadado, dirigente, miembro y boluntarionan cu a contribui na e exito di e organisacion. Como tambe mandatario di Deporte ta gradici tur e miembronan cu a yega di forma parti di e organisacion cu a yuda den e trayecto largo y bunita aki. Masha danki na presidente, sr. Earnie Panneflek y directiva. Hopi exito!





# MINISTER ENDY CROES TABATA PRESENTE NA DIA DI BIBLIOTECA 2023



Dia 20 di januari ultimo, personal di Biblioteca Nacional Aruba a celebra Dia di Biblioteca unda cu a atende diferente charla y presentacion henter dia. E aña aki a celebra di 30 edicion Dia di Biblioteca. Minister Endy Croes tabata presente na e ceremonia di apertura di Dia di Biblioteca unda a hiba palabra como tambe a felicita e personal. Meta di Dia di Biblioteca ta pa pone atencion riba trabou di biblioteca, intercambia idea tocante e trabou, e rol cu biblioteca tin den comunidad y con pa amplia e servicio. Un di e rol importante cu Biblioteca Nacional Aruba tin ta promociona di lesamento.

Minister Endy Croes a haci anuncio oficial cu Gobierno di Aruba kier incentiva tur mucha y hoben pa sigui lesa y tin acceso liber na informacion y buki. Mandatardio di Enseñansa a indica cu Aruba tambe ta sigui e desaroyo den Reino y ta haci miembresia pa mucha y hoben te 18 aña gratis entrante 1 di februari 2023. Concluyendo, Minister Endy Croes ta gradici tur e empleadonan pa nan excelente trabou. Como tambe ta felicita directora di BNA, sra Astrid Britten y tur empleado cu ta para cla pa informa comunidad di Aruba. Conocemento ta indispensabel. Mas bo lesa mas bo sa y mas bo sa, sabi bo ta! Masha pabien!







## "A TRATA E TEMA DI "TRABOU DECENTE" DURANTE UN REUNION CU INTERNATIONAL LABOR ORGANIZATION (ILO)"



Minister di Labor Glenbert Croes tabata tin e grato placer di reuni cu e director di International Labor Organization (ILO) pa e region caribense, sr Dennis Zulu y e director suplente sr. Lars Johansen aki na Aruba. E tema principal di e reunion aki tabata e tema di "trabou decente" cu ta un agenda cu gobierno di Aruba ta sostene firmemente. Trabou decente ta significa salario, trato, progreso, ambiente na trabou y oportunidad decente pa tur trahado. Tambe bienestar, salud, siguridat, y pa cada trahado na pia di trabou ta ancra den e ley di ARBO. Minister Croes a indica cu e ley di ARBO a wordo aproba den Dialogo Tripartiet Social Laboral y pa Consejo di Minister caba y ta rumbo pa haya su forma legislativo pa e yega Parlamento pa asina por haya un aprobacion.

Pa Gobierno di Aruba ta importante pa e recuperacion economico di pais Aruba traduci su mes den progreso pa trahadonan, dunadonan di trabou y pa comunidad en general. Pa cu esaki, gobierno ta uza su participacion na ILO pa pidi nan apoyo den tur sentido di palabra. Gobierno ta gradici ILO pa e apoyo cu ya nan a brinda pais Aruba y ta den proceso pa analisa con pa carga e apoyo aki, pa e no transforma den



decisionnan cu por afecta bienestar di trahado y/of dunado di trabou. Gobierno lo mester busca solucionnan cu un sentimento di solidaridat y comprension y pa cu esaki ta pidi asistencia di ILO pa medio di nan experiencia brinda e plataforma necesario pa por haci esaki.

"E tabata un reunion positivo. Mi ta spera cu Aruba por sigui siña di tur e experiencia cu ILO tin, pa bienestar y progreso di e comunidad en general" Minister Croes a expresa.



# MINISTER THIJSSEN A BISHITA BURGEMEESTER DI ZWOLLE

Minister Plenipotenciario mr. Ady Thijsen a haci un bishita na burgemeester di Zwolle Peter Snijders. Tambe presente na e combersacion aki tabata e Arubiana Margriet Leest cu ta miembro di conseho di municipio di Zwolle (gemeenteraadslid) pa e partido Groen Links.

Sr. Thijsen a gradici burgemeester Snijders pa e oportunidad aki pa combersa riba posibilidad di cooperacion entre Zwolle y Aruba. E mandatario a bisa cu e combersacionnan aki mester conduci na un relacion duradero cu diferente municipionan (gemeente) grandi of semi grandi di Hulanda y cu e ta mira un significacion grandi pa estrecha e lasonan entre Aruba y e municipionan. Segun sr. Thijsen como meta pa Aruba ta visible pa un y tur na Hulanda.

Tambe e mandatario a bisa cu cada municipio tin nan tereno specifico cu kisas por coopera riba dje.

Asina a bin dilanti durante e encuentro cu burgemeester Snijders cu Zwolle ta un ciudad cu pa siglo ta conoci pa comercio entre Europa Oriental, Alemania y Francia. ‘Tambe riba e tereno di comercio tin un cooperacion grandi cu e region rond di Zwolle. E agenda economico ta basa riba un comercio hopi fuerte en especial den e ramo di compania chikito y mediano (MKB) y tambe hopi empresanan di famia. Banda di e aspecto di economia, Zwolle ta concentra hopi riba un crecimiento cu ta segun e normanan climatologico di futuro. Esaki ta conta tambe pa construccion di vivienda y barionan,’ asina burgemeester Snijders a bisa.

Minister Thijsen a bisa di ta contento pa tende di e posicion di companianan MKB na Zwolle y tambe cu hopi scolnan tanto riba nivel di MBO como HBO tin estudionan den e direccion aki. Thijsen: ‘Hopi hoben Arubiano ta inspira pa ta entrepreneur y cuminsa nan mesun negoshi. Esaki ta algo cu nos mester stimula. Tambe mirando cu Aruba lo mester aki un par di aña hopi trahador pa motibo di “vergrijzing” – e cantidad di personanan riba 65 aña y cu esakinan lo mester bini dor di inmigracion. Nos ta kere cu Aruba mester di su mesun hendenan y pesey lo mester bin mas iniciativa pa trece nos hendenan bek nan isla natal. Papia cu partnernan social pa reserva cuponan di trabao pa Arubianonan cu ta den exterior. Entrepreneurs Arubiano semper lo inverti den Aruba y asina e placa ta keda Aruba,’ segun minister Thijsen.



Minister Thijsen a toca tambe e tema di vivienda pa estudiante y Arubiano na Zwolle, mirando cu hopi Arubiano ta acerca Arubahuis cu e pregunta aki y Arubahuis kier brinda servicio, sin cu mester duna e personan aki speransa falso. Riba e punto aki burgemeester Snijder a bisa cu e scarsedad di vivienda na Zwolle ta mescos cu e resto di Hulanda y tambe cu Zwolle no por crea maneho riba e tereno aki pa gruponan special, manera Arubiano. Segun burgemeester Snijders e aña cu a pasa Zwolle no a logra nan meta den e cantidad di vivienda cu mester a keda construe. ‘E hecho cu Zwolle tin un fabrica grandi di Scania cu ta produci 250 trucks pa dia. Tambe Albert Hein tin un centro di distribucion hopi grandi pa e parti Oost y Noord di Hulanda. Nan tur ta haci uso di trahadornan pafor di Hulanda pa traha y pa e personanan aki mester busca vivienda. E desaroyo aki ta pone mas presion riba e mercado di vivienda,’ segun burgemeester Snijders.

Finalmente a keda palabra cu minister Thijsen pa haci un bishita di trabao na Zwolle pa bishita algun scolnan, companianan pa mira unda por bin cu un programa cu lo por cumbini Aruba. Minister Thijsen a gradici burgemeester Snijders pa e recepcion y combersacion hopi ameno pa despues intercambia regalo como recuerdo di e bishita di minister Thijsen na e burgemeester di Zwolle.






# RECONOCE BO IMPACTO PA BO DESPERDICIO RESIDENCIAL OF COMERCIAL:



(Aruba's waste management blueprint)



E herarkia di desperdicio ta indica e impacto di e metodo cu ta wordo uza pa procesa desperdicio.



Ministerio di Transporte, Integridad,  
Naturalesa y Asuntonan di Adulto Mayor

"Nada no ta cambia, si nada no cambia!  
Reconoce bo impacto, un Aruba dushi ta un Aruba cu nos por maneha nos sushi!"  
Minister Ursell Arends

[www.trashtocasharuba.org](http://www.trashtocasharuba.org)

**Pa mas informacion:**  
<https://trashtocasharuba.org/pages/dump-parkietenbos>





# **NOS ACTITUD POSITIVO TA NOS FORSA PA SOLUCIONA CADA RETO Y CREA OPORTUNIDADNAN NOBO.**

Aña 2023 lo trece hopi cambio pa cada un di nos, y nan impacto riba cada un di nos lo ta fuerte. Sin embargo ban carga e positivismo cu tur e cambionan aki lo trece cosnan bon pa nos, lo crea e progreso y bienestar cu nos ciudadanonan merece. Aruba ta un pais bendiciona, y cu fe den nos Todopoderoso, nos mester carga e positivismo cu tin cosnan grandi nos dilanti. Nos actitud positivo, cu ta permiti nos mira e solucion pa cada reto y oportunidad nobo den cada situacion.



————AÑA DI UNION Y POSITIVISMO! ————